

Den su anochi di reapertura; **MUSEO ANTIGUEDAD ARUBA A IMPRESIONA E BISHITANTENAN**

ORANJESTAD (AAN) - Diahuebs ultimo pa 6'or di atardi tabata tin e reapertura di e Museo Antigüedad Aruba, den cual acto ceremonial Pastoor a bendiciona e lugar.

Situa na Timbalstraat 11, na Dakota, e museo aki, rico den reliquianan historico, a duna su promer pasonan algun aña pasa den un espacio chiquito, cual awor a ser amplia na casi e dobel di su grandura inicial, abarcando un camber cu tabata cera. Actualmente tin espacio awor pa diez vitrina grandi. Un esfuerzo unico y digno di reconocimiento di don Mario Odor hunto cu su señora Ines, y cu ayudo di nan yiunan. Gracias na nan trabao creativo y specialmente patriótico, awor Aruba ta conta cu un museo unico y interesante. Ubica na Timbalstraat 11, Museo Antigüedad Aruba a cuminsa cu su testimonio historico di Aruba cu muestranan correspondiente na e tempo cu e isla tabata bao di lama, segun don Mario ta señala, ya cu e prome piezanan cu e hunto cu su esposa a haya ta "fossilnan" cual coleccion ta uno separa. Despues ta bin un coleccion di tur clase di piedra cu tin na Aruba, y por cierto e promer

piedra a ser haya pa doña Ines, na ken su casa ta duna tur e merito.

Nan a agrega na e coleccion diferente sorto di santo haya na Aruba. Tambe nan tin historia bibo, di e promer encuentro cu tabata tin entre antepasadonan Arubiano cu e Europeonan. Esaki den forma di porcelana europeo y e accesorionan cu e Indjanan di Aruba tabata traha pa cologa den nan garganta.

Tambe e museo ta conta cu masha hopi artefacto di antaño cu e Arubianonan tabata usa.

"Mi ta kere cu e lugar ta masha interesante y acogedor, pa nos Arubianonan siña stima Aruba mas. Pa nos siña conoce naturaliza di Aruba lo mi ta kere cu nos hendenan a lague hopi atras. Nos Arubianonan mes no ta worry hopi pa conoce nan raiznan. Trese esaki pa nan ta mi satisfaccion. Mi no ta keda contento ora hendenan ta bisami "pabien" pasobra e museo ta bunita. No!. Pasobra ta Aruba e ta, y pa nos Arubianonan en general".

Riba potret por observa:

e maravilloso coleccion di piedra.

HABRI PA SCHOOLNAN



E museo ta habri pa schoolnan. E maestronan interesa na forma gruponan di alumno pa bay bishita Museo Antigüedad Aruba, por yama don Mario Odor na su cas: telefon 32039, of na Museo Numismatico: 28831, pa av-

isa di antemano di manera cu dos grupo no ta topa hunto. Esey pa facilita su persona duna splicacion di e piezanan. E museo por worde bishita den siman, excepto Diasabra cu Diadomingo atardi.

Ta bale la pena pa e docente y alumnonan, y tur mucha interesa probecha di conoce e museo aki, ya cu sin duda lo ta un experiencia hopi interesante unda nan por siña conoce y tin contacto cu "Aruba su raiznan".